

# STJÓRNARTÍÐINDI B 65 – 1990

Nr. 410

1158

15. október 1990

## REGLUGERÐ

### um ullarmat.

1. gr.

Öll ull sem kemur til mats skal metin í einhvern eftirfarandi gæðaflokka:

#### A. HVÍT ULL

**H - Úrval:** Alhvít, gallalaus og óskemmd ull. Í þennan flokk fer eingöngu ull sem er algerlega laus við gular illhærur, rusl, mor, húsagulku og tvíklippingu. Ullin skal vera fremur togfin, þelmikil og gljáandi. Kviðull og læraull skal að jafnaði tekin frá og sett í lakari flokka. Snöð skal vera lengra en 6 sm og uppfylla að öðru leyti ofangreindar kröfur.

**H - I. flokkur:** Hvít ull sem ekki er alveg laus við gular illhærur en uppfyllir að öðru leyti þær kröfur sem gerðar eru til úrvalsflokks.

**H - II. flokkur:** Hvít ull sem ekki er tæk í úrvalsflokk eða I. flokk vegna gulra illhæra, lítils háttar húsagulku (ekki hlandbrunnin) eða lítils háttar þófa en laus við heymor. Einnig ull með gróft tog eða þellítil, en að mestu laus við tvíklippingu, ásamt snöði sem er lengra en 4.5 sm. Mikið gul ull og ull með miklu af dökkum hárum flokkast sem mislit og ull með hvítum illhærum fer í H - III. flokk.

**H - III. flokkur:** Hvít ull, skemmd eða mjög gölluð. Ull með heymori og rusli, mikið gulnuð eða hlandbrunnin af húsvisit, þófin ull, þó ekki harðþófin. Ull með hvítum illhærum og ull sem er áberandi tvíklippt við rúning, ásamt snöði styttra en 4,5 sm.

#### B. MISLIT ULL

**M - I. flokkur svart:** Óskemmd svört ull með jafnan og hreinan svartan lit. Laus við grá hár, þófa, heymor, rusl og aðrar húsvisarskemmdir og laus við tvíklippingu. Svart snöð lengra en 6 sm. Kviðull og læraull skal að jafnaði tekin frá.

**M - I. flokkur grátt:** Óskemmd grá ull með steingráan litblæ. laus við gulan eða grámórauðan litblæ. Að öðru leyti eins og M - I. fl. svart.

**M - I. flokkur mórautt:** Óskemmd mórauð ull með jafnan og hreinan mórauðan lit (ekki grámórauð). Að öðru leyti eins og M - I. fl. svart.

**M - II. flokkur:** Öll önnur óskemmd mislit ull, þ.e. ull af flekkóttu, grámórauðu, botnóttu og golsóttu fé, ásamt „hvítri“ ull með miklu af gulum illhærum, dökkum hárum eða blettum. Einnig svört, grá og mórauð ull sem ekki er tæk í I. flokk vegna galla á litblæ. Óskemmt mislitt snöð lengra en 4.5 sm.

**M - III. flokkur:** Skemmd og gölluð mislit ull, eins og H - III. fl. hvít ull.

Ull sem ekki flokkast í einhvern ofangreindra flokka fer í úrkast og telst ekki söluvara. Við mat á ull er heimilt að skipta reyfum á milli gæðaflokka. Þó skal að jafnaði miðað við að hvert reyfi skiptist mest í tvo gæðaflokka.

## 2. gr.

Um leið og ull er metin í gæðaflokka skal áætla meðalnýtingu ullar í hverjum gæðaflokki. Þ.e. hlutfall hreinnar ullar að loknum þvotti. Við mat á nýtingu skal styðjast við eftirfarandi reglur:

- 80% nýting:** Hrein og óskemmd haustull, laus við sand og rusl, vel þurr.
- 75% nýting:** Lítið óhrein haustull og hrein og þurr vetrarull og snodull, sem ekki er mjög feit.
- 70% nýting:** Vetrarull og snodull í meðallagi hrein og í meðallagi feit eða lítið feit með sandskellum.
- 65% nýting:** Mjög feit eða óhrein vetrarull og hreinleg sumarull.
- 60% nýting:** Meðalhrein sumarull, mjög óhrein vetrarull og rök ull, ásamt ull með töliverðum sandi.
- 50% nýting:** Sandull, kleprull og blaut ull.

## 3. gr.

Á matsnótum til innleggjenda skal tilgreina magn ullar í hverjum gæðaflokki ásamt meðalnýtingu í hverjum flokki. Matsmenn skulu einnig tilgreina helstu ástæður fyrir matsniðurstöðum ásamt athugasemdum um frágang, ef við á, í þar til gerðum reit á matsnótu. Ull sem fer í úrkast skal fleygt en magn tilgreint á matsnótu. Ef verulegur hluti innleggs flokkast í úrkast, skal tilkynna innleggjanda það áður en ullinni er eytt.

## 4. gr.

Heimilt er að meta ull eftir öðrum reglum en tiltekna eru í 1. og 2. gr., ef kaupandi og seljandi gera með sér samkomulag um slíkt mat, t.d. þegar ull er seld beint til handiðnaðar.

## 5. gr.

Lögreglustjóri skipar ullarmatsmenn hjá afurðastöðvum og umboðsmönnum, sem taka á móti ull frá framleiðendum.

Þeir skulu hafa notið fræðslu og þjálfunar í ullarmati áður en þeir fá réttindi til starfa sem ullarmatsmenn. Þjálfun skal fara fram á matsstöð með reyndum matsmönnum undir handleiðslu eftirlitsmanns með ullarmati. Eftirlitsmaður með ullarmati mælir með skipun nýrra matsmanna að lokinni þjálfun.

## 6. gr.

Afurðastöðvar eða umboðsmenn, sem hafa ullarmatsmenn í þjónustu sinni, skulu koma upp aðstöðu til mats á ull sem til þeirra berst. Jafnan skal leitast við að meta ull jafnóðum og hún berst. Matsaðstaða skal uppfylla eftirfarandi lágmarkskröfur:

- a. Sæmilega rúmgott, þurr og trekklaust húsnæði, þannig að hægt sé að hýsa ómetna og metna ull án hættu á skemmdum, ásamt aðstöðu fyrir matsmenn.
- b. Rimlaborð fyrir hvern matsmann og ljós í hæfilegri hæð, þannig að tryggð sé góð lýsing fyrir matsmenn við störf sín. Ljósgrafi skal miðast við að lýsing sé sem líkust dagsbirtu.
- c. Greinilega merktir kassar undir hvern gæðaflokk, sem matsmenn flokka ullina í við hvert matsborð.

Sömu reglur gilda um aðstöðu við mat í ullarþvottastöð. Eftirlitsmaður með ullarmati annast eftirlit með matsaðstöðu og leiðbeinir um lagfæringar á henni.

## 7. gr.

Eftirlitsmaður með ullarmati skal hafa aflað sér þekkingar á ullarmati og meðferð ullar. Hann skipuleggur störf sín í samráði við ullarmatsnefnd. Hlutverk hans skal vera:

- a) að annast eftirlit og leiðsögn með ullarmati á öllum stöðum þar sem mat fer fram og leiðbeina matsmönnum um matsreglur samkvæmt 1. og 2. gr. og leitast við að samræma vinnubrögð matsmanna.
- b) að hafa umsjón með þjálfun nýrra matsmanna og taka þátt í undirbúningi og framkvæmd námskeiða og fræðslufunda um ullarmat og ullarmedferð fyrir ullarmatsmenn í samráði við ullarmatsnefnd.
- c) að veita bændum almenna fræðslu og leiðbeiningar um rúning, meðferð og frágang á ull.

## 8. gr.

Ullarmatsnefnd úrskurðar í ágreiningsmálum og annast yfirmat eftir því sem þurfa þykir. Ágreiningi vegna ullarmats er heimilt að vísa til ullarmatsnefndar, sem fellir úrskurð innan 30 daga frá því að erindi barst henni. Nefndinni er heimilt að kalla til matsmenn eða eftirlitsmann með ullarmati til þess að framkvæma yfirmat undir umsjón nefndarinnar. Ullarmatsmönnum er skylt að fara eftir fyrirmælum nefndarinnar um ullarmat.

Ullarmatsnefnd skal einnig standa fyrir fræðslu og leiðbeiningum til ullarmatsmanna og bænda með námskeiða- og fundahöldum. Nefndin vinnur að þessum málum í samstarfi við eftirlitsmann með ullarmati og hún er einnig ráðgefandi fyrir störf hans á öllum sviðum.

## 9. gr.

Reglugerð þessi er sett samkvæmt lögum um flokkun og mat á gærum og ull nr. 57/1990 og öðlast gildi þegar í stað. Jafnframt fellur úr gildi reglugerð um móttöku, flokkun og mat ullar nr. 416 8. desember 1976.

*Landbúnaðarráðuneytið, 15. október 1990.*

**Steingrímur J. Sigfússon.**

*Jón Höskuldsson.*

**AUGLÝSING****um tilnefningu Flugleiða hf. til að halda uppi áætlunarflugferðum milli landa.**

Samkvæmt heimild í VII. kafla laga nr. 34 21. maí 1964 um loftferðir og loftferðasamningi milli Íslands og Hollands frá 22. mars 1950, hefur samgönguráðuneytið tilnefnt Flugleiðir hf. til að halda uppi áætlunarflugi með farþega, vörur og póst milli Íslands og Hollands frá og með 1. nóvember 1990 og þar til öðru vísi kann að verða ákveðið.

Ráðuneytið hefur jafnframt heimilað Flugleiðum hf. að halda uppi áætlunarflugi með farþega, vörur og póst milli Keflavíkur og Hamborgar frá og með 1. nóvember 1990 og þar til öðruvísi kann að verða ákveðið.

*Samgönguráðuneytið, 22. október 1990.*

**Steingrímur J. Sigfússon.**

*Halldór S. Kristjánsson.*